

1

Y Rheoliad Diogelu Data Cyffredinol a Chodi Arian Elusennol: Cyflwyniad

Cynhyrchwyd gan:



FUNDRAISING
REGULATOR
RHEOLEIDDIWR CODI ARIAN

Adolygwyd gan:



Cyflwyniad

Beth yw'r Rheoliad Diogelu Data Cyffredinol

Mae'r Rheoliad Diogelu Data Cyffredinol (y Rheoliad) yn gyfraith newydd a fydd yn disodli'r Ddeddf Diogelu Data bresennol. Bydd rhaid i bob sefydliad ym mhob sector sy'n prosesu data personol gydymffurfio â'r Rheoliad - dyw hi ddim yn rhywbeth 'braf i'w gael', mae'n gyfrifoldeb cyfreithiol sylfaenol ar bob elusen i sicrhau bod y polisiau a'r gweithdrefnau cywir ganddynt yn eu lle er mwyn iddynt allu dangos eu bod nhw'n cael eu rhedeg yn briodol a'u bod nhw'n cymryd hawliau unigolion o ddifrif.

Pryd mae'r Rheoliad yn gymwys?

Daw'r Rheoliad i rym ar 25 Mai 2018. Mae Llywodraeth y DU hefyd yn deddfu i sicrhau bod y Rheoliad yn troi'n gyfraith cyn bod y DU yn gadael yr Undeb Ewropeaidd.

[Gair i gall]: Peidiwch ag aros tan hynny i ddechrau meddwl am y Rheoliad - disgwylir i sefydliadau fod yn barod erbyn 25 Mai felly dylech fod yn ystyried sut y byddwch yn cydymffurfio a gwneud unrhyw newidiadau a phenderfyniadau nawr.

Ond peidiwch â dychryn - mae deddfwriaeth diogelu data wedi bod yma ers blyneddau ac mae'r Rheoliad yn ddiweddariad o'r gofynion sy'n bodoli yn hytrach na rhywbeth hollol newydd sbon. Mae'r Comisiynydd Gwybodaeth wedi pwysleisio y dylid gweld cydymffurfio â'r Rheoliad yn daith sy'n gofyn am ymdrech barhaus yn hytrach na ras sy'n dod i ben ar 25 Mai 2018. Er y bydd Swyddfa'r Comisiynydd Gwybodaeth (ICO) yn rheoleiddio yn erbyn y Rheoliad o'r dyddiad hwn, mae'r Comisiynydd yn glir "y gall y rhai sy'n hunanadrodd, sy'n ymgysylltu â Swyddfa'r Comisiynydd Gwybodaeth i ddatrys materion ac sy'n gallu dangos bod trefniadau atebolrwydd effeithiol ganddynt yn eu lle ddisgwyl i hyn gael ei gyfrif pan fyddwn yn ystyried unrhyw weithredu rheoleiddiol."

[Gair i gall]: Felly, ceisiwch ddeall beth sy'n wahanol, penderfynwch pa mor dda rydych yn cydymffurfio eisoes, a rhowch gynllun a phroses ar waith i wneud y newidiadau gofynnol.

Diffiniadau allweddol

Data personol: unrhyw wybodaeth sy'n ymwneud ag unigolyn byw y gellir ei adnabod yn uniongyrchol neu'n anuniongyrchol o'r data. Mae hyn yn cynnwys enw, cyfeiriad, manylion cyswllt ond gallai hefyd gynnwys dwy neu ragor o ddarnau o wybodaeth amhenodol a allai, o'u cyfuno, enwi unigolion penodol gan gynnwys, er enghraifft, cyfuniad o ryw, dyddiad geni, dangosydd daearyddol a disgrifwyr eraill.

Catgorïau arbennig o ddata personol: data sy'n ymwneud â thras hiliol neu ethnig, safbwyntiau gwleidyddol, credoau crefyddol neu athronyddol, aelodaeth o undeb llafur, gwybodaeth genetig a biometrig, iechyd a bywyd rhywiol neu gyfeiriadedd rhywiol bod dynol.

Rheolydd data: mae rheolydd yn pennu dibenion a dulliau prosesu data personol - bydd sefydliadau yn 'rheolyddion data' (e.e. elusennau, banciau, cwmnïau) pan fyddant yn dal ac yn defnyddio data cwsmeriaid a chleientiaid.

Prosesu data personol: mae'n golygu gwneud rhywbeth gyda data personol - mae hyn yn cynnwys cadw cofnodion, defnyddio data ar gyfer marchnata uniongyrchol, cyflawni rhwymedigaeth gytundebol ymysg pethau eraill. Mae diffiniad llawnach o "ddata personol" i'w weld yn <https://ico.org.uk/>

Beth mae hyn yn ei olygu i elusennau a chodi arian elusennol?

Bydd elusennau yn 'rheolyddion data' mewn sawl ffordd, gan gynnwys:

- Fel cyflogwr sy'n prosesu data personol gweithwyr, ymddiriedolwyr a gwirfoddolwyr.
- Fel darparwr gwasanaethau wedi'u personoli i fuddiolwyr a chleientiaid.
- Fel sefydliad codi arian neu ymgyrchu sydd â rhoddwyr a chefnogwyr.

Gall codwyr arian unigol fod yn rheolyddion data hefyd os ydynt yn gweithredu'n annibynnol ar elusen wrth brosesu data (er enghraifft, codwyr arian cymunedol sydd efallai'n cadw manylion am gefnogwyr pan fyddant yn ymgymryd ag ymgyrch "er budd" elusen ond nid yw'n gweithredu mewn rhinwedd swyddogol ar ran yr elusen honno - Gweler **Papur Briffio 3** i gael rhagor o fanylion).

Sut gallwn ni brosesu data personol yn gyfreithlon?

Nid yw'r Rheoliad yn rhwystro elusennau rhag ymgyrchu, codi arian neu ddarparu gwasanaethau i fuddiolwyr. Ond mae'n golygu pan fydd elusen yn gwneud hynny mae'n rhaid iddi wneud hynny mewn ffordd deg a chyfreithlon, bod yn dryloyw a pharchu hawliau preifatrwydd unigolion.

Gall elusennau brosesu data personol (e.e. anfon deunyddiau marchnata, cysylltu â defnyddwyr gwasanaeth, storio cofnodion gweithwyr), ond rhaid gwneud hyn yn unol â 'sail gyfreithlon ddilys' a amlinellir yn y Rheoliad. Mae chwe sail ar gael ar gyfer prosesu:

- (a) Cydsyniad: gallwch ddangos bod unigolyn wedi perfformio gweithred gadarnhaol glir (megis dweud "ie" i gwestiwn neu dicio blwch optio i mewn) i ganiatáu i chi brosesu ei ddata personol ar gyfer diben penodol.
- (b) Contract: mae'r prosesu yn angenrheidiol ar gyfer contract sydd gennych â'r unigolyn, neu oherwydd ei fod wedi gofyn i chi gymryd camau penodol cyn arwyddo contract.
- (c) Rhwymedigaeth gyfreithiol: mae'r prosesu yn angenrheidiol er mwyn i chi gydymffurfio â'r gyfraith (heb gynnwys rhwymedigaethau cytundebol).
- (d) Buddiannau hanfodol: mae'r prosesu yn angenrheidiol i ddiogelu bywyd rhywun.
- (e) Tasg gyhoeddus: mae'r prosesu yn angenrheidiol er mwyn i chi gyflawni tasg er budd cyhoeddus neu ar gyfer eich dyletswydd swyddogol, ac mae sail glir i'r dasg neu'r ddyletswydd o dan y gyfraith.
- (f) Buddiannau cyfreithlon: Mae'r prosesu yn angenrheidiol ar gyfer eich buddiannau cyfreithlon neu fuddiannau cyfreithlon trydydd parti oni bai bod buddiannau neu hawliau neu ryddid yr unigolyn yn bwysicach na'r buddiannau hynny. (Ni all hyn fod yn gymwys os ydych yn awdurdod cyhoeddus sy'n prosesu data i gyflawni eich tasgau swyddogol).

[Gair i gall]: Mae'n bwysig i elusennau ddeall nad yw un sail yn 'well' neu'n bwysicach nag eraill - bydd y sail sy'n fwyaf priodol i'w defnyddio yn dibynnu ar eich diben a'ch perthynas â'r unigolyn. Rhaid i chi benderfynu beth yw'ch sail gyfreithlon cyn dechrau prosesu'r data a rhaid i chi gynnwys eich sail gyfreithlon yn eich hysbysiad preifatrwydd. Ceisiwch gael hyn yn iawn y tro cyntaf - ni ddylech newid i sail gyfreithlon wahanol yn ddiweddarach heb reswm da.

Hawliau unigolion o dan y Rheoliad

Yn ogystal ag amlinellu'r seiliau gwahanol ar gyfer gallu prosesu data personol, mae'r Rheoliad hefyd yn cynnwys nifer o hawliau ar gyfer unigolion y mae angen i elusennau eu cydnabod a gweithredu arnynt.

- Yr hawl i gael eich hysbysu
- Yr hawl i gael mynediad
- Yr hawl i unioni cam
- Yr hawl i ddileu
- Yr hawl i gyfyngu prosesu
- Yr hawl i gludadwyedd data
- Yr hawl i wrthwynebu (gan gynnwys gwrthwynebu marchnata uniongyrchol)
- Hawliau o ran gwneud penderfyniad awtomatig a phroffilio.

I gael rhagor o wybodaeth ar hawliau unigol ewch i:

<https://ico.org.uk/for-organisations/guide-to-the-general-data-protection-regulation-gdpr/individual-rights/>

Beth arall y mae angen i elusennau ei wybod?

Mae atebolrwydd a llywodraethu yn egwyddorion pwysig o'r Rheoliad. Mae hyn yn golygu bod dyletswydd gyffredinol gan elusennau i ddangos eu bod yn cydymffurfio â gofynion y Rheoliad. Bydd rhaid i bob elusen roi mesurau llywodraethu cymesur yn eu lle, gan gynnwys adolygu a chymeradwyo polisiau mewnol, dogfennu gweithgareddau, cadw cofnodion o brosesu data, a chynnal asesiadau effaith diogelu data pan fydd angen.

[Gair i gall]: Meddyliwch amdano o safbwynt rheoleiddiwr. Os yw unrhyw un yn cwestiynu eich arferion, sut byddech chi'n gallu profi eich bod yn cydymffurfio a chyfiawnhau'r penderfyniadau a wnewch?

Ceir gofynion hefyd ynghylch diogelwch data a throsglwyddiadau rhyngwladol, a'r ddyletswydd i hysbysu'r ICO o fewn 72 awr (gan gynnwys ar y penwythnos neu'r tu allan i oriau gwaith) os yw'r rheoliad data wedi cael ei dorri. Mewn rhai achosion, bydd rhaid i chi hysbysu gwrthrych y data hefyd. Mae'r risgiau o fethu â chydymffurfio yn cynnwys dirwyon, risg i enw da, ac unigolion yn dwyn achos cyfreithiol felly mae'n bwysig ei chael hi'n iawn!

I gael rhagor o wybodaeth am eich holl ddyletswyddau a chymau gweithredu posibl ewch i www.ico.org.uk

Hefyd - peidiwch ag anghofio bod rhaid i elusennau ddilyn y Cod Ymarfer Codi Arian ar gyfer y safonau sy'n ofynnol pan fydd elusennau yn codi arian a osodwyd gan y Rheoleiddiwr Codi Arian. Bydd hyn yn cynnwys rhannau perthnasol o'r Rheoliad, ond hefyd y gofynion pellach y mae'n rhaid i elusennau eu dilyn yn eu gweithgareddau codi arian.

Rhestr wirio ar gyfer elusennau:

- Ydych chi'n gwybod beth yw gofynion y Rheoliad ac ydych chi wedi ystyried beth mae hyn yn ei olygu ar gyfer eich elusen chi a'r data personol rydych yn ei brosesu?
- Ydych chi wedi cynnal adolygiad neu archwiliad o'r data sydd gennych ar hyn o bryd, eich polisiâu a'ch gweithdrefnau? Beth sy'n rhaid i chi ei ddiweddarau neu ei newid?
- Ydych chi wedi ystyried y sail gyfreithlon y byddwch yn ei defnyddio ar gyfer dibenion prosesu data gwahanol ac ydych chi'n deall sut i ddefnyddio pob sail mewn ffordd deg?
- Ydych chi'n ymwybodol o hawliau unigolion ac a fydddech chi'n gallu ymateb yn briodol i unrhyw geisiadau a gewch ganddynt ynghylch eu data personol?
- Ydych chi wedi meddwl am yr holl fathau gwahanol o brosesu y mae'ch elusen yn ymgymryd ag ef (er enghraifft, gwirfoddoli, ymgyrchu, codi arian) ac ydych chi wedi mabwysiadu dull gweithredu ar gyfer y sefydliad cyfan?
- Ydy'ch system a chronfa ddata Rheoli Cysylltiadau Cwsmeriaid yn gallu cadw data mewn modd priodol a diogel?
- Ydych chi'n atebol - oes polisi diogelu data gennych chi yn ei le ac ydych chi'n dogfennu penderfyniadau, ac yn hyfforddi staff?

Cyfeirio ac adnoddau:

ICO

Canllaw i'r rheoliad diogelu data cyffredinol

<https://ico.org.uk/for-organisations/guide-to-the-general-data-protection-regulation-gdpr/>

Y Rheoleiddiwr Codi Arian

Cod Ymarfer Codi Arian

<https://www.fundraisingregulator.org.uk/code>

Llyfrgell diogelu data: Arweiniad a Gwybodaeth Rheoliad Diogelu Data Cyffredinol

<https://www.fundraisingregulator.org.uk/more-from-us/resources/data-protection-library-general-data-protection-regulation-gdpr-guidance-and>

IoF

Y Rheoliad Diogelu Data Cyffredinol: Yr Hanfodion ar gyfer Sefydliadau Codi Arian

<https://www.institute-of-fundraising.org.uk/library/gdpr-the-essentials-for-fundraising-organisations/>

Cefnogwyd gan:



CHARITY COMMISSION
FOR ENGLAND AND WALES



Scottish
Fundraising
Standards
Panel

